

80.

Na osnovu člana 37. stav 1. tačka f. Ustava Zeničko-dobojskog kantona, Skupština Zeničko-dobojskog kantona, na 28. sjednici, održanoj 31.03.2009. godine, donosi:

**ZAKON O IZMJENAMA I DOPUNAMA ZAKONA  
O JAVNOJ USTANOVİ UNIVERZITET U  
ZENICI**

**Član 1.**

U Zakonu o Javnoj ustanovi Univerzitet u Zenici („Službene novine Zeničko-dobojskog kantona“, broj: 6/05 i 11/06) u članu 7. u stavu 1. riječ: „Pravilima“ zamjenjuje se riječju: „Statutom“, kao i u preostalom tekstu Zakona u odgovarajućem padežu.

**Član 2.**

U članu 11. riječi: „Islamska pedagoška akademija“ u odgovarajućim padežima zamjenjuje se riječima: „Islamski pedagoški fakultet“.

**Član 3.**

Član 12. mijenja se i glasi:

„Djelatnost Univerziteta je:

- visoko obrazovanje;
- obrazovanje odraslih i ostalo obrazovanje;
- studentski domovi;
- istraživanje i eksperimentalni razvoj u prirodnim naukama;
- istraživanje i eksperimentalni razvoj u tehničkim naukama;
- istraživanje i eksperimentalni razvoj u društvenim naukama;
- istraživanje i eksperimentalni razvoj u humanističkim naukama;
- istraživanje i eksperimentalni razvoj u biotehničkim naukama;
- istraživanje i eksperimentalni razvoj u biomedicini i zdravstvu;
- istraživanje i eksperimentalni razvoj u umjetnosti;
- ostali pravni poslovi;
- računovodstveni, knjigovodstveni i revizioni poslovi, savjetodavni poslovi u vezi poreza;
- istraživanje tržišta i ispitivanje javnog mnijenja;
- poslovni i menadžment konsalting;
- arhitektonske i inženjerske djelatnosti i tehničko savjetovanje;
- tehničko ispitivanje i analiza;

- pružanje konsultantskih usluga u vezi s računarskom opremom (hardware);
- ostale konsultantske usluge i izrada software-a;
- obrada podataka;
- izrada i upravljanje bazama podataka;
- ostale srodne računarske djelatnosti;
- izdavanje knjiga;
- izdavanje novina;
- izdavanje časopisa i periodičnih publikacija;
- izdavanje zvučnih zapisa;
- ostala izdavačka djelatnost;
- umjetničko i književno stvaralaštvo i scenska umjetnost;
- djelatnost biblioteka;
- rad sportskih objekata i stadiona;
- kantine.

U okviru registrirane djelatnosti Univerzitet u Zenici može obavljati djelatnost proizvodnje u manjim serijama proizvoda, odnosno predmeta, koji su rezultat naučnoistraživačkog rada, odnosno stručnog rada organizacionih jedinica.“

**Član 4.**

U članu 15. u stavu 2. na kraju teksta iza riječi „Univerziteta“ dodaju se riječi: „u skladu sa zakonom“.

**Član 5.**

U članu 16. brišu se stavovi 1. i 2.

**Član 6.**

U nazivu V. poglavlja, riječ „UPRAVLJANJE“ zamjenjuje se riječima: „ORGANI UNIVERZITETA“.

**Član 7.**

Iza naziva V. poglavlja dodaje se novi član „17.“ koji glasi:

- „Organi Univerziteta su:
- Upravni odbor;
  - Senat;
  - Rektor.

Univerzitet može imati i druga stručna tijela, odnosno tijela za vođenje poslovanja, čije se osnivanje, sastav i nadležnost uređuju Statutom ili drugim općim aktom.

Obaveza svih organa upravljanja, rukovođenja, nadzora i drugih organa Univerziteta je da u postupku izbora i imenovanja osiguraju odgovarajuću spolnu zastupljenost.

Terminološko korištenje muškog ili ženskog spola, u ovom zakonu, podrazumijeva uključivanje oba spola.

Dosadašnji član „17.“, postaje član „17.a“.

**Član 8.**

U dosadašnjem članu 17. stav 2. mijenja se i glasi:

„Konačno imenovanje i razrješenje predsjednika i članova Upravnog odbora vrši Vlada Kantona u skladu sa zakonom.“

U istom članu u stavu 3. iza riječi: „izbora“ dodaju se riječi: „u javnoj i transparentnoj proceduri konkursa.“

U istom članu stav 4. mijenja se i glasi: „Rektor, prorektor, direktor visoke škole kao i članovi Senata ne mogu biti članovi Upravnog odbora.“

**Član 9.**

Član 18. mijenja se i glasi:

„Upravni odbor Univerziteta ima sedam članova i čine ga četiri člana iz reda osnivača, dva člana iz reda akademskog osoblja i jedan član iz reda studenata.

Kandidate iz reda akademskog osoblja i reda studenata predlaže Senat u skladu sa zakonom i Statutom, u javnoj i transparentnoj proceduri javnog konkursa.

Predsjednik Upravnog odbora javne visokoškolske ustanove imenuje se iz reda osnivača.“

**Član 10.**

Član 19. mijenja se i glasi:

„Upravni odbor Univerziteta (u daljem tekstu: Upravni odbor) odgovoran je za poslovanje Univerziteta.

Upravni odbor obavlja poslove utvrđene zakonom i Statutom Univerziteta, a naročito:

- donosi Statut Univerziteta uz prethodnu saglasnost osnivača, te donosi opće akt o unutrašnjoj organizaciji i sistematizaciji radnih mjeseta, kao i druge opće akte u skladu sa zakonom i Statutom Univerziteta;
- donosi odluku o osnivanju drugih pravnih lica u skladu sa zakonom i Statutom Univerziteta, uz prethodnu saglasnost osnivača;
- utvrđuje planove finansiranja i razvoja;
- donosi godišnji program rada Univerziteta na prijedlog Senata Univerziteta;
- donosi finansijski plan;
- usmjerava, kontrolira i ocjenjuje rad rektora u domenu finansijskog poslovanja;
- rješava pitanja odnosa sa osnivačem;
- odlučuje o korištenju sredstava za rad u skladu sa Statutom Univerziteta;
- odgovara osnivaču za rezultate rada Univerziteta;
- odlučuje o prigovoru zaposlenika na odluke organa Univerziteta koji su u prvom stepenu odlučivali o pravima, obavezama i odgovornostima zaposlenika iz radnog odnosa;
- najmanje jedanput godišnje podnosi osnivaču izvještaj o poslovanju Univerziteta;

- donosi konačnu odluku o izboru i razrješenju direktora Studentskog centra;
- obavlja i druge poslove u skladu sa zakonom i Statutom Univerziteta.“

**Član 11.**

Iza člana 19. dodaju se novi članovi „19.a“ i „19.b“ koji glase:

**„Član 19.a**

Odgovornost za akademska pitanja ima Senat kao akademsko tijelo Univerziteta, koje čine predstavnici akademskog osoblja u radnom odnosu, kao i predstavnici studenata.

Senat Univerziteta odlučuje o svim akademskim pitanjima, a posebno:

- odlučuje o pitanjima nastavne, naučne, umjetničke i stručne djelatnosti Univerziteta;
- donosi Etički kodeks, kojim se utvrđuju etička načela u visokom obrazovanju, objavljivanju naučnih rezultata, odnosu prema intelektualnoj svojini, odnosima između nastavnika i saradnika, drugih zaposlenih i studenata, odnosu prema javnosti i sredstvima javnog informiranja, i uopće o nastupanju visokoškolske ustanove, nastavnika, saradnika i studenata u pravnom prometu;
- donosi opće akte u skladu sa zakonom i Statutom Univerziteta;
- donosi nastavne planove i nastavne programe dodiplomskog, postdiplomskog i doktorskog studija;
- donosi konačne odluke o izboru i razrješenju rektora i prorektora Univerziteta, uz prethodnu saglasnost Vlade Kantona;
- donosi konačne odluke po prigovoru kandidata za izbor i razrješenje dekana i prodekanu, kao i direktora instituta;
- bira akademsko osoblje na prijedlog naučno-nastavnog vijeća, odnosno naučnog vijeća organizacione jedinice;
- imenuje komisije u postupku stjecanja doktorata nauka;
- dodjeljuje počasno zvanje „profesor emeritus“, te „počasni doktor nauka“;
- daje inicijativu Upravnom odboru za organiziranje i ukidanje fakulteta i drugih organizacionih jedinica Univerziteta, kao i studijskih odsjeka;
- odobrava razvojne i organizacione planove;
- imenuje stalna ili privremena tijela, radne grupe, komitete, grupe za praćenje kvaliteta rada i slično;
- propisuje odredbe kojima se regulira rad organa koje imenuje Senat;
- utvrđuje upisnu politiku;
- obavlja i druge poslove u skladu sa zakonom i Statutom Univerziteta.

**Član 19.b**

Senat Univerziteta odlučuje o akademskim pitanjima na prijedlog stručnih tijela organizacionih jedinica, kao i drugih tijela Univerziteta i predstavničkih tijela studenata.

Bliže odredbe o broju članova, sastavu, mandatu, i načinu rada Senata utvrđuju se Statutom Univerziteta.

Senat ima predsjedavajućeg koji priprema i predsjedava sjednicama.

Predsjedavajući se bira iz reda članova Senata, s tim da rektor i prorektori ne mogu biti imenovani za predsjedavajućeg.

Rad Senata biće uređen Poslovnikom o radu kojeg donosi Senat u roku od 30 dana od dana stupanja na snagu ovog zakona.“

**Član 12.**

Iza dosadašnjeg člana 19. naziv poglavљa: „VI RUKOVODENJE“ briše se, a preostali naslovi poglavљa umanjuju se za jedan broj.

**Član 13.**

Član 20. mijenja se i glasi:

„Univerzitetom rukovodi rektor u skladu sa zakonom i Statutom Univerziteta.“

Rektor se bira na mandat od četiri godine i može biti ponovo izabran.

Ista osoba može se imenovati na dva uzastopna manda.

Rektora Univerziteta bira Senat, na osnovu javnog konkursa, uz prethodnu saglasnost Vlade Kantona.

Za rektora može biti izabran nastavnik u naučno-nastavnom i umjetničko-nastavnom zvanju redovnog profesora koji ispunjava uvjete za to zvanje na Univerzitetu.

Bliže odredbe o postupku izbora i razrješenja, te razlogima za smjenu rektora Univerziteta prije isteka mandata, poslovima, odgovornostima i ostalim pitanjima koja se odnose na funkciju rektora Univerziteta utvrđuju se Statutom Univerziteta.“

**Član 14.**

Član 21. mijenja se i glasi:

„Rektor Univerziteta za svoj rad u domenu akademskih pitanja odgovara Senatu, a u domenu poslovanja Upravnom odboru.“

Rektor Univerziteta obavlja poslove utvrđene zakonom i Statutom Univerziteta, a naročito:

- zastupa i predstavlja Univerzitet;
- organizira i rukovodi radom Univerziteta, i odgovoran je za zakonitost rada;
- predlaže opće i donosi pojedinačne akte u skladu sa za-

konom i Statutom Univerziteta;

- predlaže Upravnom odboru i Senatu mјere za unapređenje rada Univerziteta;
- predlaže Upravnom odboru mјere za djelotvorno i zakonito obavljanje djelatnosti Univerziteta;
- predlaže Upravnom odboru, Senatu i osnivaču osnove planova rada i razvoja Univerziteta;
- predlaže Upravnom odboru unutrašnju organizaciju i sistematizaciju radnih mјesta;
- izvršava odluke Upravnog odbora i drugih tijela Univerziteta;
- odlučuje o korištenju sredstava do iznosa utvrđenog Statutom Univerziteta;
- odlučuje o pravima, obavezama i odgovornostima zaposlenika iz radnog odnosa;
- podnosi Upravnom odboru izvještaj o izvršenju finansijskog plana;
- naredbodavac je za izvršenje finansijskog plana;
- učestvuje u radu Rektorske konferencije Bosne i Hercegovine;
- obavlja i druge poslove u skladu sa zakonom i Statutom Univerziteta.“

**Član 15.**

Iza člana 21. dodaju se novi članovi „21.a“, „21.b“, „21.c“, „21.d“, „21.e“, „21.f“, „21.g“, „21.h“ i „21.i“, koji glase:

**Član 21.a**

Rektoru u radu pomažu prorektori.

Broj prorektora, nadležnosti, uvjeti i postupak izbora i razrješenja prorektora bliže se uređuje Statutom Univerziteta.

**Član 21.b**

Stručno tijelo fakulteta, odnosno umjetničke akademije je naučno-nastavno, odnosno umjetničko-nastavno vijeće (u daljnjem tekstu: vijeće).

Vijeće čine nastavnici i predstavnici saradnika, koji su u radnom odnosu u organizacionoj jedinici i koji učestvuju u naučno-nastavnom procesu na fakultetu, odnosno umjetničkoj akademiji, kao i predstavnici studenata u skladu sa Statutom Univerziteta.

Vijeće ima predsjedavajućeg koji priprema i predsjedava sjednicama.

Predsjedavajući se bira iz reda članova vijeća, s tim da dekan i prodekan ne mogu biti imenovani za predsjedavajućeg.

Rad vijeća biće uređen poslovnikom o radu kojeg donosi vijeće u roku od 30 dana od dana stupanja na snagu ovog zakona.

Vijeće u okviru svoje nadležnosti:

- daje mišljenje i prijedloge dekanu o akademskim, naучnim, umjetničkim i stručnim pitanjima u skladu sa Statutom Univerziteta;
- daje prijedloge Senatu u vezi sa promjenama u strukturi i sadržaju studijskih programa i nastavnim metodama;
- predlaže nastavni plan i program za organizacionu jedinicu, kao dio integralnog nastavnog plana i nastavnog programa Univerziteta;
- bira i razrješava dekana i prodekanu fakulteta, odnosno umjetničke akademije;
- bira predstavnika u Senat Univerziteta;
- utvrđuje prijedlog komisija koje se obrazuju u postupku stjecanja naučnog stepena doktora nauka;
- imenuje komisije za provođenje postupka stjecanja naučnog, odnosno umjetničkog stepena magistra;
- utvrđuje prijedlog za izbor kandidata u naučno-nastavna, umjetnička i nastavna zvanja;
- obavlja i druge poslove u skladu sa Statutom Univerziteta i drugim općim aktima.

Bliže odredbe o nadležnostima vijeća utvrđuju se Statutom Univerziteta.

### Član 21.c

Organ rukovođenja fakulteta, odnosno umjetničke akademije je dekan.

Dekan obavlja poslove utvrđene zakonom i Statutom Univerziteta, a naročito:

- predstavlja fakultet, odnosno umjetničku akademiju i ima prava i obaveze u skladu sa Statutom Univerziteta;
- predlaže rektoru unutrašnju organizaciju i sistematizaciju radnih mesta na fakultetu;
- donosi pojedinačne akte u skladu sa zakonom i Statutom Univerziteta;
- odlučuje u prvom stepenu o pojedinačnim pravima, obavezama i odgovornostima zaposlenika iz radnog odnosa ili u vezi sa radnim odnosom na fakultetu/ umjetničkoj akademiji;
- za svoj rad odgovara naučno-nastavnom, odnosno umjetničko-nastavnom vijeću;
- obavlja i druge poslove utvrđene zakonom i Statutom Univerziteta.

### Član 21.d

Dekan se bira na mandat od četiri godine i može biti ponovo izabran.

Ista osoba se može imenovati na dva uzastopna manda- ta u istoj organizacionoj jedinici.

Dekana bira naučno-nastavno, odnosno umjetničko-na- stavno vijeće, a na osnovu javnog konkursa.

Za dekana može biti izabran nastavnik u naučno-na-

stavnom i umjetničko-nastavnom zvanju redovnog ili vanrednog profesora ukoliko ispunjava uvjete za to zvanje na Univerzitetu.

Bliže odredbe o postupku izbora i razrješenja, te razlo- zima za smjenu dekana fakulteta, odnosno umjetničke aka- demije prije isteka mandata, poslovima, odgovornostima i ostalim pitanjima koja se odnose na funkciju dekana utvr- đuju se Statutom Univerziteta.

Za svoj rad dekan je odgovoran naučno-nastavnom, od- nosno umjetničko-nastavnom vijeću.

### Član 21.e

Stručno tijelo naučnog instituta je naučno vijeće.

Naučno vijeće instituta čine šefovi podorganizacionih jedinica instituta i zaposlenici instituta sa naučnim stepe- nom doktora i magistra nauka.

Naučno vijeće ima predsjedavajućeg koji priprema i predsjedava sjednicama.

Predsjedavajući se bira iz reda članova vijeća, s tim da direktor ne može biti imenovan za predsjedavajućeg.

Rad vijeća biće uređen poslovnikom o radu kojeg do- nosi vijeće u roku do 30 dana od dana stupanja na snagu ovog zakona.

Naučno vijeće u okviru svoje nadležnosti:

- predlaže Senatu Univerziteta programe naučnoistraživačkog i stručnog rada instituta i programe stručnog usavršavanja;
- bira i razrješava direktora;
- imenuje komisije za pripremanje prijedloga za izbor u naučna zvanja;
- utvrđuje prijedlog za izbor kandidata u naučna zvanja;
- utvrđuje prijedlog za stručno usavršavanje u zemlji i inostranstvu;
- utvrđuje prijedlog za realizaciju praktične nastave;
- utvrđuje naučnoistraživačke projekte;
- utvrđuje strateške projekte za razvoj instituta;
- obavlja i druge poslove u skladu sa Statutom i drugim općim aktima Univerziteta.

Bliže odredbe o nadležnostima naučnog vijeća utvrđuju se Statutom Univerziteta.

### Član 21.f

Organ rukovođenja naučnog instituta je direktor.

Direktor naučnog instituta obavlja poslove utvrđene za- konom i Statutom Univerziteta, a naročito:

- predstavlja institut i ima prava i obaveze u skladu sa Statutom Univerziteta;
- predlaže rektoru unutrašnju organizaciju i sistematiza- ciju radnih mesta na institutu;
- donosi pojedinačne akte u skladu sa zakonom i Statu- tom Univerziteta;
- odlučuje u prvom stepenu o pojedinačnim pravima,

- obavezama i odgovornostima zaposlenika iz radnog odnosa ili u vezi sa radnim odnosom na institutu;
- organizuje naučnoistraživački i stručni rad na institutu i predlaže mјere za njegovo poboljšanje;
- za svoj rad odgovara naučnom vijeću;
- obavlja i druge poslove u skladu sa zakonom i Statutom Univerziteta.

### Član 21.g

Direktor se bira na mandat od četiri godine i može biti ponovo izabran.

Ista osoba se može imenovati na dva uzastopna manda.

Direktora bira naučno vijeće, a na osnovu javnog konkursa.

Za direktora instituta može biti izabrano lice koje pored općih zakonskih uvjeta ima naučni stepen doktora nauka i izbor u jedno od naučno-nastavnih zvanja (redovnog ili vanrednog profesora) ukoliko ispunjava uvjete za to zvanje na Univerzitetu.

Bliže odredbe o postupku izbora i razriješenja, te razlozima za smjenu direktora instituta prije isteka manda, poslovima, odgovornostima i ostalim pitanjima koja se odnose na funkciju direktora, utvrđuju se Statutom Univerziteta.

### Član 21.h

Organ rukovođenja Studentskog centra je direktor.

Direktor Studentskog centra obavlja poslove utvrđene zakonom i Statutom Univerziteta, a naročito:

- predstavlja Studentski centar i ima prava i obaveze u skladu sa Statutom Univerziteta;
- predlaže rektoru unutrašnju organizaciju i sistematizaciju radnih mјesta u Studentskom centru;
- donosi pojedinačne akte u skladu sa zakonom i Statutom Univerziteta;
- odlučuje u prvom stepenu o pojedinačnim pravima, obavezama i odgovornostima zaposlenika iz radnog odnosa ili u vezi sa radnim odnosom u Studentskom centru;
- predlaže promjenu i proširivanje djelatnosti i organizacije Studentskog centra;
- predlaže mјere za poboljšanje i unapređenje procesa rada u Studentskom centru;
- za svoj rad odgovara rektoru Univerziteta;
- obavlja i druge poslove u skladu sa zakonom i Statutom Univerziteta.

### Član 21.i

Direktor se bira na mandat od četiri godine i može biti ponovo izabran.

Ista osoba se može imenovati na dva uzastopna man-

data.

Direktora bira Upravni odbor, a na osnovu javnog konkursa.

Za direktora Studentskog centra može biti izabrano lice koje pored općih zakonskih uvjeta ima visoku stručnu spremu, najmanje tri godine radnog iskustva na odgovarajućim rukovodećim poslovima.

Bliže odredbe o postupku izbora i razriješenja, te razlozima za smjenu direktora Centra prije isteka manda, poslovima, odgovornostima i ostalim pitanjima koja se odnose na funkciju direktora utvrđuju se Statutom Univerziteta.“

### Član 16.

Članovi 23. i 24. se brišu, pa dosadašnji član 25. postaje član 23., a slijedeći članovi se umanjuju za dva broja.

### Član 17.

Član 25. mijenja se i glasi:

„Statut je osnovni opći akt Univerziteta kojim se uređuju pitanja značajna za obavljanje djelatnosti Univerziteta.

Statutom se bliže uređuju:

- organizacija Univerziteta;
- zastupanje i predstavljanje Univerziteta;
- pravila za izbor članova Upravnog odbora;
- načini organiziranja i izvođenje studija;
- pravila studiranja i prava studenata;
- izbor u nastavno-naučna i saradnička zvanja;
- način implementacije Evropskog sistema prenosa bodova (u daljem tekstu: ECTS),
- kriteriji za dodjelu akademskih titula;
- obaveze Univerziteta prema osnivaču;
- ovlaštenja Univerziteta u pravnom prometu;
- organizacija i nadležnosti organizacionih jedinica;
- statusne promjene, obrazovanje novih organizacionih jedinica i studijskih odsjeka;
- ostvarivanje prihoda, upravljanje sredstvima i imovinom;
- akademska, finansijska i druga ovlaštenja organizacionih jedinica u pravnom prometu,
- organizacija naučnoistraživačkog i umjetničkog rada;
- kriteriji za provođenje procesa evaluacije i objavljivanje rezultata provedene evaluacije;
- broj članova Senata i način njihovog biranja;
- oblik i nivo učešća studenata u radu ustanove;
- način izjašnjavanja i donošenja odluka po pojedinim pitanjima, kao i preciziranje odluka koje se mogu donositi tajnim glasanjem;
- druga pitanja u skladu sa zakonom.

Univerzitet ima i druge opće akte u skladu sa zakonom i Statutom Univerziteta.“

**Član 18.****VLADA**

Član 26. mijenja se i glasi:

„Statut Univerziteta donosi Upravni odbor Univerziteta uz prethodnu saglasnost osnivača.“

Izmjena i dopuna Statuta Univerziteta vrši se na način i u postupku predviđenom za donošenje Statuta.“

**Član 19.**

Član 29. mijenja se i glasi:

„Predsjednik i članovi Upravnog odbora, rektor i prorektori Univerziteta, dekani i prodekanovi fakulteta, direktori instituta i centra izabrani na funkciju prije stupanja na snagu ovog zakona ostaju na istoj dužnosti do isteka mandata na koji su izabrani.“

Mandati osoba iz stava 1. ovog člana, računaju se kao prvi mandat i iste osobe mogu biti ponovo birane na iste dužnosti ukoliko ispunjavaju uvjete predviđene zakonom.“

**Član 20.**

Član 30. mijenja se i glasi:

„Upravni odbor Univerziteta će donijeti Statut Univerziteta i uskladiti druge opće akte Univerziteta sa ovim zakonom u roku od šest mjeseci od dana njegovog stupanja na snagu.“

**Član 21.**

Članovi 31. i 32. se brišu, dosadašnji član 33. postaje član 31. a slijedeći članovi se umanjuju za dva broja.

**Član 22.**

U članu 34. iza riječi „donijeti“, riječi: „opće akte“ zamjenjuju se riječima: „Statut i druge opće akte“.

**Član 23.**

Ovlašćuje se Zakonodavno-pravna komisija Skupštine Zeničko-dobojskog kantona da utvrdi prečišćeni tekst Zakona o izmjenama i dopunama Zakona o Javnoj ustanovi Univerzitet u Zenici.

**Član 24.**

Ovaj Zakon stupa na snagu osmog dana od dana objavljanja u „Službenim novinama Zeničko-dobojskog kantona.“

**81.**

Na osnovu člana 16. stav 1. Zakona o Vladi Zeničko-dobojskog kantona („Službene novine Zeničko-dobojskog kantona“, broj: 16/00, 7/05 i 4/06), te člana 7. stav 1. i člana 8. stav 3. Zakona o prikupljanju, proizvodnji i prometu sekundarnih sirovina i otpadnih materijala ( Službene novine Federacije Bosne i Hercegovine“, broj: 35/98), Vlada Zeničko-dobojskog kantona, na 113. sjednici, održanoj 13.03.2009. godine, donosi

**UREDBU****O NAČINU PRIKUPLJANJA, ODLAGANJA,  
RAZVRSTAVANJA I OBAVLJANJA OTKUPA  
OTPADNIH MATERIJALA****DIO PRVI – OPĆE ODREDBE****Član 1.  
(Predmet)**

Ovom uredbom uređuje se način prikupljanja, odlaganja, razvrstavanja i obavljanja otkupa otpadnih materijala na području Zeničko-dobojskog kantona ( u daljem tekstu: Kanton).

**Član 2.  
(Obim primjene)**

Odredbe ove uredbe se odnose na sva pravna i fizička lica registrovana za prikupljanje, odlaganje, razvrstavanje i obavljanje otkupa otpadnih materijala na području Kantona.

**DIO DRUGI – PRIKUPLJANJE, ODLAGANJE I  
RAZVRSTAVANJE OTPADNIH MATERIJALA****Član 3.  
(Prikupljanje, odlaganje i razvrstavanje  
otpadnih materijala)**

Pravna i fizička lica registrovana za prikupljanje, odlaganje, razvrstavanje i obavljanje otkupa otpadnih materijala pri obavljanju djelatnosti dužna su postupati u skladu sa Uredbom o selektivnom prikupljanju, pakovanju i označavanju otpada („Službene novine Federacije Bosne i Hercegovine“, broj: 38/06).